



16. august 2024

UKA 2024/124

Inatsisartut maleruagassaasa § 36 malillugu apeqquteqaat tunngavigalugu oqallisissiamik ima siunnersuuteqarpunga:

Apeqquteqaat tunngavigalugu oqallisissiatut siunnersuut, politikikkut timersortartut pikkorivissut annertunerusumik aningaasaliiffigissanerigut imaasillugu, timersortartut sungiusarnissaminnut pitsaanersumik atugaqarnissaat aammalu nunat tamalaat akornanni ajugaaniunnernut peqataanissamut periarfissaqarnerulerlutik.

(Inatsisartunut ilasortaqa Anna Wangenheim, Demokraatit)

Timersorneq inuunerinnartuuvoq, peqqinnarnerulluni aammalu inooriaaseq tunngavigalugu nappaatinut pinaveersaartitsuulluni, aammalu ataqatigiinnermik, ataatsimoornermik, tunniusimanermik, angusassamik toraagaqarnermik, pissusissamillu malinnilluarnermik tunniussisarluni.

Demokraatinut nuannersuuvoq takullugu, politikikkut aammalumi inuiaqatigiinni Kalaallit Nunaanni Timersortartut kattuffiata anguniagaa, 2030-imi timimik aalatitsinerpaatut inissisimassasugut qanoq tapersorneqartigisoq. Anguniagaq pitsaasoq, kisiannili iliuseqarnikkut tapersersortarialik. Tassanilu isumaga malillugu arajutsineqalaarsimasoraara, qanoq pingaaruteqartigisoq tassunga atasumik timersortartut pikkorivissut ukkatarinerunissaat.

Demokraatinimi qularutigineqanngilluinnarpoq, uagut maani timersortartut unammisartut ukkatarinerusariaqarigut aammalu ullumernit aningaasanik amerlanernik atuiffiginerusariaqarigut. Timersornermi pikkorivissoqartillugu inuiaqatigiinnut ataqatigiissitsisarpoq, inuusuttunut nuannaartorisaaqalernermik kinguneqartumik qularnanngilluinnartumillu aamma inuit amerlasuut – pingaartumik meeqqat inuusuttullu – timersorlutik aallartittarlutik, tamannalu qanorluunniit pitsaasuuvuq. Taamaaliornikkullu timersorluni unammisarnermut aningaasaliinerunerup timersorneq tamaat isigalugu iluaqtississavaa.

Tassanilu aamma arajutsineqartartoq aajuna, timersortartut pikkorivissut piginnaasanik tunisisarmata, suliffeqarfanni piumaneqartunik. Imminut anguniagassittarnermik ilinniutaasarpoq sungiusarnerlu toraagalik ingerlanneqartarluni. Imminut piumaffigisinnaanerup pingaaruteqassusaa ilinniarneqartarpoq. Imaammami, pitsaasuussagaanni ukkatarinninnermik peqartariaqarmat sungiusarfissallu aggerfigijuaannarlugit. Piginnaasat taakku suliffeqarfanni pisariaqartippagut, tamakkulu atuakkatigut atuarnikkut ilinniarneqarsinnaanatik. Akerlianilli, timersornermut qitiulluinnartuullutik.

Timersorneq, timigissarnerlu Demokraatinut taamaammat pingaaruteqartorujussuartut isigaarput inuiaqatigiit akornanni. Kissaatigaarpullu, uagut nunatut timersornermi atukkat pitsanngorsarnissaanut aningaasaliinerusariaqartugut. Assersuutissaatsialaavoq ivigaasaaqqanik arsaaffiit nunatsinni sumi tamani takussaasorpasuit. Demokraatit siullerpaamik siunnersuutigaat, ivigaasaaqqanik arsaaffiilortoqassasoq ukiut 15-ningajaat matuma siorna. Taamani kikkut tamarmik qularput, ullumikkulli ivigaasaaqqanik



arsaaffiit piulersimapput, tamannalu tamatta nuannaarutigigunarparput. Arsaattarfinni ivigaassaaqqani nuannannersuaqartarpoq, taakkulu aamma qulakkeeqataaffigisarpaat, pitsaasumik nuannersumillu aalanissarput.

Qanorilllutami siunissaq eqqarsaatigalugu timersortartunut pikkorivissunut pissutsinik pitsanngorsaassaagut? Uagut politikikkut ersarissumik periusissiliussaagut imaluunniit tamanna Elite Sport Greenland-imut aamma/imaluunniit immikkut sulialinnut isumagitissavarput? Kattuffiit immikkut suliallit aningaasaliiffiginerussavagut? Sungiusarnermi atortussanut allanullu sinaakkutissanut aningaasaliissaagut? Nammineq kajumissutsiminnik suliaqartut ukkatarinerussavagut?

Tassani immaqa pingaartuuvoq tikkuassallugu, atortut pitsaannerusut pikkorivissunoortut timersortartunut tamanut iluaqutaassammata, atortitaasut aamma timersortartunut pikkorivissunut atornerqartarmata.

Isumaqarpunga, pingaartuuvoq, oqallinneq aallartissallugu, isumaqarama, timersortartunit pikkorivissut pisinnaasaannik atorluaasinnaalluta. Unammillernartoqarportaaq. Soorlu assersuutigalugu takusimavarput, kattuffiit immikkut suliaqartut arlallit peqatigiiffiillu namminneq kajumissusertik atorlugu suliaqartut aningaasassaaleqinertik nalunaarutigimmassuk timersortitsinerillu annikillisarnerqartut, timersornermut timersortartunullu pissutsinik pitsaanningsunik kinguneqaannaratik, aammali inuiaqatigiinnut kinguneqarnerlummata.

§ 37-apeqqummut akissutitut¹ taamatutaaq erserpoq, Elite Sport Greenland-ip suliniutai 2025 unissasut. Suliai pingaarnerit takuneqarsinnaapput, kissaatigineqartoq timersortartut siuariartornissaasa attattuarnissaat, taamaaliornikkut unammillersinnaaneq pitsanngorsarneqassammata. Tamanna maannakkorpiaq piviusumut ersarissumik akerliuvoq, soorlu assersuutigalugu TAAK oqaatigineqarmat, nuna tamakkerlugu unammisartut katersornissaanut akissaqannginneq ilaatigut peqqutaalluni. Tamanna timersortartunut annilaangalersitsivoq kajumissuseerutitsisinnaallunilu.

Taamatutaaq kinguaariit tulliinut maannakkullu inuusuttuusunut attuivoq, politikikkut pingaarnersiuisoqaranilu piumassuseqartoqanngimmat. Taamatutaaq Naalakkersuisut erseqqissarpaat § 37-apeqqummut normu 172-2024, eqimattap suliaqartup september 2024 naappat misissuisimanermi inernera tunniutissagaa, *"timersornermi immikkut unammilligassat periarfissallu erseqqissarniarlugit."*²

Tassungalu ilutigalugu politikikkut isummerneq amigaataavoq, qanoq aningaasaliissutit qaffanneqarsinnaanersut taamaaliornikkut Elite Sport Greenlandip suliniutimi annikillineqarneranut aningaasatigut ajornartoorneq pissutigalugu, aaqqinneqarsinnaanersoq. Taamaattumik taanna oqallinnissamik ammaassivoq, qanoq ililluta politikikkut siunissami nutaamik timersortartunut pikkorivissunut nutaamik sinaakkusiisariaqarnerisugut.

¹ 2024-mi § 37 naapertorlugu apeqqutit 172-mut akissutit

² 2024-mi § 37 naapertorlugu apeqqutit 172-mut akissutit



Isummersuutit isumaqataasut isumaqataannngitsullu isumaliutigisannut partiinit allanit Naalakkersuisuniillu tusarnissaat qilanaaraara.